

Soʻz sehridan sheʻr mehriga

Har bir davrning, har bir makonning oʻz muammolari, talablari boʻlishi tabiiy. Ijodkor insonlar yoʻl topib oʻz soʻzini, fikrini turli shakllarda ifoda etib kelganlar. Shuning uchun ham Prezidentimiz eʼtirof etganlariday “xalqning dardu tashvishlari bilan yashash odamiylikning eng muhim mezoni”dir. Xalq xizmatiga mahram, dardiga malham boʻlish sharafli burch. El-yurtimizning shodiyonalarida oʻz sheʼrlari bilan, koʻplab taniqli qoʻshiqchi sanʼatkorlarning repertuaridagi qoʻshiqlar matnining muallifi sifatida hamisha yurt xizmatida va ardogʻida ular. Bu inson Bobur Bobomuroddir.

Har juma kuni institutimizda tashkil etiladigan “Ibratli, isteʼdodli, ijodkor insonlar” ruknining navbatdagi mehmoni Oʻzbekiston Yozuvchilar uyushmasining aʼzosi, Oʻzbekistonda xizmat koʻrsatgan madaniyat xodimi iqtidorli shoir Bobur Bobomurod boʻldilar. Shu haftaning oʻzida uchta taʼlim muassasasida talaba va oʻqituvchilar bilan ijodiy muloqot uyushtirganlari eʼtiborga va tahsinga loyiq. Nizomiy nomidagi Toshkent davlat pedagogika universitetida, Toshkent Moliya institutida, DXX institutida oʻtkazilgan uchrashuvlarning davomi sifatida institutimizda uyushtirilgan maʼrifiy kecha ham katta ahamiyatga molik boʻldi.

Shoir oʻzining yangi yozgan sheʼrlaridan oʻqib berish asnosida talabalar tomonidan berilgan savollarga ham aniq va muxtasar tarzda javob qaytardilar. Shoirning sheʼrlari bilan aytiladigan qoʻshiqlarning mohir ijrochilaridan taniqli, isteʼdodli sanʼatkorlardan Baxtiyor Sultonov va Sherbeklarning chiqishlari davraga yanada fayz baxsh etdi.

Shoirning soʻzi hamisha qanot bogʻlab tillardan tillarga koʻchadi, qanchadan qancha insonlar uning sheʼrlarini yod aytib yayrashadi, xirgoyi qilib qoʻshiq qilishadi. Ana shunday zavqni bera oladigan shoirlarimizdan sanalgan Bobur Bobomurodning tashrifi institutimiz jamoasini xushnud etdi.



“GIM” fakulteti “Gumanitar fanlar” kafedrasining oʻqituvchisi Bahridin Muqimov axboroti